

Wakita na a puwatertaa ura umele ge EGGYE-AHA Á IBRAHIMA

Dadaamiya á bamiya elva an we á Egdza-aara

¹ Ndza werre wá, Dadaamiya a ndater elva ser kwakya ge eggye-aha a miya an we á nabi-aha, ndza a ndater elva an pute gergere kwakya.

² Amá am kinire na wá, Dadaamiya aŋkwa á bamiyá elva an we á Egdza-aara. A nderaa duksa bademme keni á ba áte erva an Egdza-aara ŋanna. Ndza a eksesaa ba ŋane geni á de kwaraná ŋane duksa bademme.

³ Tá zharaná am ŋane emnde yaikkire antara njá á Dadaamiya bademme. Duksa bademme njaanja an unŋule-aara na wá, á ŋana ba ŋane an hakuma á elva-aara. A magaa pute geni emnde tá sesse am ervaunŋe á Dadaamiya, tá gevge emnde cufedŋe. Am iga a una ŋanna maa, a zlalehe á dem samaya, aŋkwa á nja am nadafa á Dadaamiya, slekse arge duksa bademme.

Yaisu ŋane male arge malika-aha bademme

⁴ Dadaamiya a ganve Egdza-aara male arge malika-aha bademme, a vante zhera na jauje ge náza-aatare bademme. Adaba a detaa ŋane Egdza-aara. Daaci a jateru an una ŋanna ge malika-aha.

⁵ Adaba baaka malika na Dadaamiya a banaa: Ba ekka una ka egdza-aaruwa, iya keni ya Eddeŋa. Amá a banaa una ge

Yaisu. Zlabe á daliye, baaka malika na ndasenda Dadaamiya áte ṅane: Yá de gev Eddeṅara, ṅane keni á de gev egdza-aaruwa. ⁶ Amá am sarte na átira bela Egdza-aara na, gevge ba seke makaji-aara na wá, á ba ṅane: Baḍemme a malika-aha-aara tá de kezlan ugje ge ṅane. ⁷ Á ba Dadaamiya áte malika-aha wá: A fater ba ge maganaa slera, itare ta ba seke effeya antara nara á kára. ⁸ Amá áte Egdza-aara wá, á ba ṅane:

Ámbarka á ṅa Dadaamiya, sleksire á ṅa á de zleka ḍekideki. Ká de maga sleksire á ṅa an jirire.

⁹ Ekka wá, wedere á ṅa ba jirire, yakanaaya mandzawire. Aḍaba una ṅanna, a eksaksehe ge Dadaamiya á ṅa, a gakve male arge emnde á ṅa baḍemme, a geḍaktehe, ervaunḍe á ṅa ba seke nama.

¹⁰ Adaliye a ba ṅane á ba áte Egdza-aara ṅanna: Yaakadada, am fakta, ba ekka una ka nderaa haha, samaya keni ba slera á erva á ṅa.

¹¹ Baḍemme á duksa-aha ṅanna tá de zlauzle, amá ekka wá, ká nja dem ba ge ḍekideki. Baḍemme a duksa-aha ṅanna tá de gevge emgyegwe ba seke kacakaca,

¹² ká de takwalatertakwala ba seke bagwadza, ká de keḍanaakeda daradza-aatare, amá ekka wá, ká nja dem ba ge ḍekideki, baaka halavuwa á shifa á ṅa.

¹³ Baaka malika na Dadaamiya a banaa:

Sawa, njinja am naḍafa-aaruwa, yá gatervege kelaade-aha á ṅa náza puwa sera á ṅa.

Amá a banaa una ṅanna ge Egdza-aara. ¹⁴ Malika-aha wá, itare ta ba emnde a slera á Dadaamiya, Dadaamiya á belaterbela, tá de melateru ge emnde na ni tá de lyelye shifa-aatare.

2

Faumifa hyema áte unṅule a lya na a maramiyaa Dadaamiya

¹ Adaba una ṅanna faumifa hyema ba shagera áte elva na mi cenanaa miya geni a dzalamiyefka áte unṅule. ² Adaba werre wá, ndza ta se balanaa ba malika-aha labare na gevge jirire na, daaci ma ware una cenaaka, fansareka na, ṅanaaṅa Dadaamiya an shairiya. ³ Náza á miya wá, a tsaaka an una ṅanna. Mí de shaná estara kena shifa á miya, má mí feka hyema am elva a lya shifa na a sanaa ba Yaakadada Yaisu an ire-aara na? Emnde na ta cenanaa á ba an hyema-aatare wá, ndaramindaha geni elva ṅanna jirire. ⁴ Dadaamiya keni a naba maresehe seydire á elva ṅanna an nalaama-aha, an najipu-aha, antara duksa gergere ta maganaa emnde ṅanna an hakuma á Shedfekwe Cufedfe na a vatertaa Dadaamiya an namaari-aara.

Yaisu wá, Slelya á emnde ba ṅane

⁵ Dadaamiya vaterteka dekideki ge malika-aha geni tá de kwaraná itare duniya na á de sawa, mí ndahaná miya na. ⁶ Amá aṅkwa am wakita á Dadaamiya, a bantsa ura umele:

Ázara urimagwe keni, geni ka Dadaamiya, ká dzámá ṅane? Urimagwe keni duksa he, geni ká fanu hyema?

⁷ Ka naba ganaahe emtsaade cekwaangudí á katafke á malika-aha, ádaliye ka vante yaikkire antara dárádza.

⁸ Ka yaa duksa bademme am erva-aara.

Má Dadaamiya a yaa duksa bademme am erva-aara wá, amaana baaka duksa dekideki ni ṅane á kwareka na. Amá am kinire na wá, mí nánka emtsaade sleksire-aara na á kwará duksa bademme na. ⁹ Diyamidiya geni duksa bademme á kwaraná ba Yaisu, amá a naba ganaahe ge Dadaamiya am sarte cekwaangudí á katafke á malika-aha, geni á emtsamtsa am slede á emnde bademme. Una ṅanna keni Dadaamiya a magateraa ba ṅurna ge emnde. Daaci Dadaamiya a vante yaikkire antara darádza ge Yaisu adaba a shu zladá, a eksar emtsa ṅanna.

¹⁰ Duksa bademme á ba am erva á Dadaamiya, a nderanaa ba ṅane. Zlaya jipu una ni a naba yaa Yaisu am zladá na, geni ṅane a gevge edda una hyephye am duksa bademme, lauktu á de gatervá ṅane emnde kwakya egdzara á Dadaamiya, á lyatersá ṅane, á daterá ṅane á de katafke á Dadaamiya am yaikkire-aara.

¹¹ Ba Yaisu una á gatervege emnde cufedde á katafke á Dadaamiya. ṅane antara emnde na a barateraa ṅane, garevge ba egdzara á ura palle. Adaba una ṅanna wanka zherwe ge Yaisu, a dateraa an egdzara á Eddeṅara. ¹² Ndza a bantsa ṅane: Yá de balaterá zhera á ṅa ge egdzar mama-aha-aaruwa, yá de galáká am dagave á

emnde á ŋa. ¹³ Adaliye a ba ŋane: Yá njá á ba áte Dadaamiya palle. Zlabe ádaliye a ba ŋane: Náwa iya antara emnde na a puwimaa Dadaamiya am erva.

¹⁴ Emnde ŋanna, ta ba emndimagwaha, daaci Yaisu a naba gev urimagwe ba seke itare, a emtsehe geni á kedanaakeda ba dekideki hakuma á Shaitaine na an hakuma ge ceba emnde na. ¹⁵ A palateraa an una ŋanna emnde na ndza ŋateraana lyawa á emtsa na bademme. ¹⁶ Ŋane saaka á se melateru ge malika-aha, amá a se melateru ge eggye-aha á Ibrahima. ¹⁷ Daaci una zlaya geni á gevge ba seke egdzar mama-aha-ŋara am duksa bademme. Estuwa á dzegwándzegwa gev *li-man yaikke, slebara haypa á emnde ge melátera an Dadaamiya. Ŋane slekemaare, dzayye ervaunđe-aara am slera á Dadaamiya. ¹⁸ Kina wá, á dzegwándzegwa a melateru ge emnde na tá am bada á shaitaine, adaba ŋane keni ndza a shushe zlada am lámare ŋanna.

3

Yaisu male arge Muusa

¹ Daaci egdzar mama-aha-aaruwa, emnde cufedfe, kure keni a dzerakursaa ba Dadaamiya geni kwá gevge emnde-aara, tsawanaatse enkale á kure á ba áte Yaisu palle. Ba ŋane una slebela á Dadaamiya geni á se gev *liman á miya emnde a fetarfe. ² Ba Dadaamiya una a faare slera ŋanna, ŋane keni a magaa slera ŋanna an ervaunđe-aara palle, ba seke una Muusa keni ndza a magaa

slera-aara an ervaunƙe-aara palle am huƙe á há á Dadaamiya. ³ Emnde tá galeka há, amá tá gálá edda una a nderaa há. Ba duksa palle ge tara Yaisu an Muusa keni, shagera tá gálá ba Yaisu arge Muusa. ⁴ Ba kelaa há a nderanaa ba ura, amá duksa bademme wá, a nderanaa ba Dadaamiya. ⁵ Muusa wá, ñane ndza ba walaadi am huƙe á há á Dadaamiya, slera-aara ndza ba mága seydire á názena watse á baterná Dadaamiya ge emnde. A magaa slera ñanna an ervaunƙe-aara palle. ⁶ Amá *Almasiihu wá, ñane Egdza huƙe á há á Dadaamiya, bademme á huƙe á há á Dadaamiya á ba am erva-aara. Ñane keni a magaa slera-aara an ervaunƙe palle am huƙe á há ñanna. Huƙe á há á Dadaamiya ñanna wá, ba miya, má tsamiyaatse dzañdzañe áte unñule-aara, má kezlamiyanyveka tama á miya áte ñane.

Tate á puwansepuwe á emnde á Dadaamiya

⁷ Adaba una ñanna, cenaumicena názena a baminaa Shedekwe Cufedƙe, a ba ñane:

Vatená má cenakurancena kwara á Dadaamiya wá,

⁸ magauka degdegire á ire seke una ndza ta maganaa eggye-aha á kure werre, am sarte na ta magaa yawe kul ufaƙe am kaamba na. Ndza ta maganaa gardire ge Dadaamiya, ta naba gya hala-aara.

⁹ A ba Dadaamiya, naránna tsa najipu-aha na ya maganaa iya antara itare am yawe kul ufaƙe ñanna, aley ta naba gyaa hala-aaruwa.

¹⁰ Adaba una ṅanna, a naba jihe ge ervaunḡe jipu áte emnde ṅanna, a ba iya am ervaunḡe-aaruwa: Emnde na ervaunḡe-aatare yiyiye an iya, tá d̄abeka unḡule-aaruwa dekideki.

¹¹ Am jija ervaunḡe áte itare, ya naba zu waḡa geni yá de belaternaaka dekideki ge emnde ṅanna, ge se puwansepuwe antara iya am tate na ya maraterna a iya.

¹² Egdzar mama-aha-aaruwa, faufa hyema geni a jerka ura am dagave á kure una yiyiye ervaunḡe-aara an Dadaamiya, geni a de yánka Dadaamiya Sáksage. ¹³ Amá ma vaatara keni ndaunda ba elva na ni á de vakurte ndeḡa na am dagave á kure. Daaci á de badakuruka shaitaine ge mága haypa, antara ge mága degdegire á ire. Magaumága una ba kelaazare am sarte na zlaḡe kwá an shifa na. ¹⁴ Máki kezlamiyánveka fetarfire á miya áte Yaisu, ba kalkale antara una am zunḡwire wá, daaci mi emnde á Yaisu á ba an jirire.

¹⁵ Anḡwa am wakita á Dadaamiya, a ba ṅane: Vatená, ma cenakuráncena kwárá á Dadaamiya, magauka degdegire á ire seke una ndza ta maganaa eggye-aha á kure werre, ta maganaa gardire ge Dadaamiya. ¹⁶ Emnde-ara ṅane cenaráncena tsa kwara á Dadaamiya, ta naba maganaa gardire na? Ba emnde na ndza a satersaa Muusa a sawa am larde a Misera na. ¹⁷ Emnde-ara ṅane yawe kul ufade tá já Dadaamiya an ervaunḡe na? Ba itare ṅanna zlaḡe á d̄aliye emnde na ta gu haypa kwakya an Dadaamiya, adaba una ṅanna ta naba matsehe am huḡe á kaamba.

¹⁸ Emnde-ara ɲane Dadaamiya a zateru waɗa geni á de vaterteka ɗekideki de puwansepuwe antara ɲane na? Ba emnde ɲanna zlaɓe áɗaliye ndza faransarka ɗekideki na.

¹⁹ Ba estuwa egdzar mama-aaruwa, náwa namiyánna baɗemme geni Dadaamiya a piyaterante dem tate á puwansepuwe aɗaba baakire á fetarfire-aatare.

4

¹ Werre, á ba Dadaamiya á de vaterte tate á puwansepuwe ge emnde, una ɲanna namána na zlaɓe ba nja-aara ge miya keni. Daaci, faumifa hyema áte ire á miya, geni a eptseka palle á miya á dem kataliya, daaci watse á taa daaka á dem tate á puwansepuwe ɲanna.

² Miya cenamiyancena labare á higa ba seke náza eggye-aha á miya werre am kaamba, amá elva ɲanna magateranka payɗa ge itare aɗaba cenaráncena, amá fartarka átekwa.

³ Miya emnde na famitarfe áte ɲane na wá, mí de shánsha dem tate á puwansepuwe ɲanna. Amá emnde na fartarka áte Dadaamiya wá, aɲkwa elva a ndasaa Dadaamiya áte itare, a ba ɲane:

Jija ervaunɗe, daaci ya naba zu waɗa geni ya de belaternaaka ɗekideki geni tá se puwansepuwe antara iya am tate na ya maraternaa iya.

Am fantaufe, am sarte na Dadaamiya zlauzle am slera á nderá duksa baɗemme wá, a naba puwansehe. Puwansepuwe ɲanna wá, aɲkwa sem vatená. ⁴ Am tate umele am wakita á Dadaamiya, aɲkwa á ndaha elva a háre ge

vuyire, a ba ɲane: Dadaamiya a zlaa slera-aha-aara am háre ge uŋkwahire, ge vuyire wá, a naba puwansehe. ⁵ Am tate umele keni a ba ɲane: Tá de demka dekiŋdeki á dem puwansepuwe antara iya am tate na ya maraterna a iya. ⁶ Emnde na ta cenaa labare á higa zuŋwe, amá daraaka á dem tate á puwansepuwe ɲanna wá, adaba faransarka ge Dadaamiya. Ge puwansepuwe ɲanna wá, sem vatená keni zlaŋe aŋkwa baráma-aara ge emnde umele keni. ⁷ Adaba una ɲanna, Dadaamiya a faa sarte umele zlaŋe adaliye, amaana, zamane na. Náwa a faa sarte ɲanna estuwa, haraare á maga yawe kwakya am iga una ni eggye-aha á miya ta maganaa gardire na, a ba Dadaamiya an we á *Dawuda: Vatená, ma cenakurancena kwára-aaruwa wá, magauka degdegire á ire.

⁸ Ma andze daterda Zhausuwe á dem tate á puwansepuwe á jirire wá, Dadaamiya ma andze á feka sarte umele ge dá ura á dem tate á puwansepuwe. ⁹ Daaci diyamidiya geni aŋkwa puwansepuwe á jirire á katafke á emnde á Dadaamiya ba seke una ndza a puwansaa ɲane am háre ge vuyire na. ¹⁰ Ma ware una shansha puwansepuwe ɲanna áza Dadaamiya, ɲane keni zlauzla slera-aara, ba seke una a puwanse ge Dadaamiya am slera-aara na. ¹¹ Daaci wavau-miwava ge dem tate á puwansepuwe ɲanna, faumifa hyema geni a jerka ura am dagave á miya una á fansarka ge Dadaamiya, seke una ndza faransarka eggye-aha á miya werre na. Daaci edda-aara á de geyegeye á kataliya.

¹² Elva á Dadaamiya wá, an hákuma jipu,

á vaterte shifa na á zleka na ge emnde, á dzegwándzegwa mága slera yaikke am er-vaunđe á ura. Elva ɲanna wá, an ndzedá jipu ba seke masalam na an ga slare we bukerđe na. Á dzegwándzegwa ɲgye á dem dzágwa á ubiye-aha, dete zeba keni baɗemme. Elva ɲanna wá, jauje ba ge masalam keni an ndzedá. A dzegwándzegwa tsanmaare ge ura am názena á slaslaná ɲane am ervaunđe-aara baɗemme. ¹³ Baaka duksa na ni an shebe am ice á Dadaamiya. Duksa baɗemme a nderanaa ba ɲane, ɲane diyaadiya baɗemme. Watse mí de eppálá á katafke-aara názena mi maganaa miya baɗemme.

*Yaisu ɲane male á *liman-aha baɗemme*

¹⁴ Miya, diyamidiya ganakini anƙwa *liman á miya yaikke. Ba ɲane una Yaisu, *Egdza á Dadaamiya, zlaazlálá á dem samaya. Daaci sey mi tsaatse ba shagera ate názena mi fetaare átekwa na. ¹⁵ Liman á miya ɲanna wá, sleza-mivarze jipu, aɗaba diyaadiya názena zlazlaɗa áte miya baɗemme. ɲane keni shaushe zlaɗa-aha gergere ba seke náza á emnde baɗemme. Ba báda keni, ndza ta ebbada an duksa gergere baɗemme, amá ɲane magaaka haypa ɗekideki. ¹⁶ Aɗaba una ɲanna, gaumiyaɗtege á deza Dadaamiya slemagamiya ɲgurna ba kelaazare, gaumiyaɗtege á deɲɲara an baakire á shaige, geni á de zamivarze, á de magamiya ɲgurna am wedera-aha á miya baɗemme.

5

¹ Baɗemme a male-aha á *liman-aha, tá dzeraterá á ba am dagave á emnde, tá tsater ge mága slera á Dadaamiya am dagave á emnde, tá dáná itare sadake á emnde á de katafke á Dadaamiya, geni á yateraare haypa-aha-aatare. ² Má emnde diyarka mága jirire, dzalarevdzále áte barámá á Dadaamiya, liman wá, ɲane á naba cenatercena, aɗaba ɲane diyaadiya názena zlazlaɗa áte emnde. Diyaadiya geni ɲane keni hyefka am duksa umele. ³ Daaci sadake na á danná ɲane ge Dadaamiya na wá, á dándá náza á ire-aara emtsaade, geni a yanaarye Dadaamiya haypa-aara, lauktu á danná náza á emnde geni á yateraarye Dadaamiya ge itare keni. ⁴ Baaka ura á dzegwándzegwa eksese slera á limanire an ire-aara, sey má a ɗahanaa Dadaamiya ge mága slera á limanire ɲanna, seke una ndza a ɗahá *Haruna werre.

⁵ Yaisu keni ekseseka ba ɲane an ire-aara, geni á gevge *liman yaikke, amá ndza a eksesaa ba Dadaamiya, a ba ɲane, á elvan ge ɲane: Ba ekka una ka Egdza-aaruwa, iya keni ya Eddeɲa. ⁶ Am tate umele keni aɲkwa am wakita á Dadaamiya a ba ɲane, á elvan ge ɲane: Ekka, ka liman dem ba ge ɗekideki, limanire á ɲa seke limanire á Malkisadaka.

⁷ Am sarte na Yaisu aɲkwa am duniya wá, ndza a ɲala Dadaamiya á ba an ká kwara, ámbera á kyuwa geni á se melanumele, aɗaba diyaadiya geni aɲkwa hakuma á Dadaamiya ge se lya shifa-aara. Dadaamiya cenanvarcene. Am iga á emtsa-aara, a naba tsantehe zlaɓe

ádaliye, adaba fesarfire-aara áte ɲane. ⁸ ɲane *Egdza á Dadaamiya, aley keni wá, a naba shu zladá, geni fesarfire-aara á gevge ba parakke. ⁹ Am sarte na zlanazle slera ɲanna bademme maa, ɲane gevge slelyaterlya ba ge defideki ge emnde na tá anƙwa fansarfe na bademme. ¹⁰ Á dzegwándzegwa lyaterlya adaba a tsanaa ba Dadaamiya liman yaikke áte limanire á Malkisadaka.

Faufa hyema, dzalawevka áte unɲule á Dadaamiya

¹¹ Kwakya elva na ɲá kátá ndakurnda áte ɲane, amá wá, zlazladá jipu ge palakurá una ɲanna, adaba kure keni yiyiye hyema á kure, kwa taa cenvaaka duksa áte watsewatsire. ¹² Kina wá, zlaya ma kwá kwaratersá kure elva á Dadaamiya ge emnde, adaba harakuraahare am huƙe-aara, amá kwá kátá tá kwarakursá ba emnde zlaƙe adaliye ba duksa na ndza kwa tsahese zunɲwe keni. Zlaya ma kwá de katafke áte unɲule á Dadaamiya, amá kwasau kwá ba am fantaufe. Ekkure wá, zlaya ma kwá zá dafa dzanɲanɲe seke dawalaa, amá kwá kátá shá ba uba seke egdzere áte erva. ¹³ Ma ware una zlaƙe á kátá ba sha uba na, ɲane wá, zlaƙe ba seke egdzere áte erva. Egdzere áte erva wá, zlaƙe diyaaka duksa na shagera antara duksa na shagerka. ¹⁴ Amá dawalaa diyardiya lanaale tara duksa na shagera, antara duksa na shagerka bademme, ma zlazladá keni.

6

¹ Daaci geyaumika arge duksa na kwaye mi tsahese am fantaufe á miya ge fetaare áte Yaisu *Almasiihu na, mí zlalawa á de katafke an tsáha duksa-aara na zlazlaɗa na keni. Una názu á zlayater ge emnde na hararaare am fetarfire na. Duksa ŋanna mi tsahese kwaye am fantaufe na wá, amaana, mága tuba arge serhaypa na á dá ura á dem emtsa na, antara fetarfe áte Dadaamiya. ² Adaliye elva a mága baptisma gergere antara puwaare *erva á barka ge ura, an elva a tsa emnde a faya, ira elva á shairiya á Dadaamiya vaci tsafaya. ³ Baɗemme á una-aha ŋanna wá, diyamidiya. Kina wá, mi zlalawa á de katafke má wayatewáyá Dadaamiya.

⁴ Eptsaare ge duksa na diyardiya emnde wá, kurguneka, aɗaba má ura a yanaa ba ŋane unŋule á Dadaamiya, baaka pute umele ɗekideki ge melanumele geni á eptsa am tuba. Aɗaba emnde na ndza tá am parakkire á Dadaamiya, ndza sharánsha barka á Dadaamiya antara Shedekwe-aara am ervaunɗe, ⁵ ndza emtáke elva á Dadaamiya am hyema-aatare, ndza sharánsha hakuma am duniya na á de sawa na keni, ma tá de njá am huɗe-aara, ⁶ aley ni tá eptsaná ba iga ge Dadaamiya wá, baaka pute umele ɗekideki ge melaterumele geni tá eptsa am tuba. Aɗaba ba seke tá átira ja *Egdza á Dadaamiya ge buwire áte dzangala, ta ganve zhera-aara duksa ba dey á katafke á emnde baɗemme.

⁷ Itare ta ba seke fe: Má yawe aŋkwa á hya á dem fe ŋanna, fe ŋanna á mága náza za an

barka jipu, aṅkwa á melaterumele ge emnde a ehherd̄a-aara, baaka yanya-aara. ⁸ Amá má fe ṅanna á epts̄a ba dake antara masa wá, fe ṅanna baaka nampire-aara. Baaka barka am fe ṅanna, a yaranya ba ge d̄ekid̄eki.

⁹ Amá, egdzar mama-aha-aaruwa, ma ṅandaase estuwa keni wá, diyaṅerdiya geni ekkure kwá aṅkwa áte unṅule á jirire, daaci á de lyakurlya Dadaamiya. ¹⁰ Dadaamiya ṅane sle-jirire, á taa viyannaaka slera na kwa maganaa kure, kwa naba melateruhe ge emnde a fetarfe, sem vatená kwá á ba átira melaterumele na. Una ṅanna á mara wáyáva á kure áte Dadaamiya. Baḍemme á una-aha ṅanna, á taa viyanaaka. ¹¹ Duksa na ṅá kátáná ṅere ázekure wá, ma ware á kure keni magaumága ba estuwa an higa á kure campaukkwe dem halavuwa á duniya, yawanka d̄ekid̄eki. Daaci kwá de shánsha názena kwá tamaná kure áza Dadaamiya. ¹² Gawevka emnde a masefe, amá d̄abaud̄ába sera á emnde a fetarfe na tá an ndzed̄a jipu, hararaare áte unṅule á Dadaamiya. Ba itare una tá de shá názena a ba Dadaamiya á de vaterte ge emnde-aara na.

Názena a ndasaa Dadaamiya baaka pekyaaara

¹³ Am sarte na Dadaamiya a ṅgud̄anaa namána ge Ibrahima, a zu waḍa geni ba jirire á de emmága duksa na a ndasaa ṅane ṅanna. Ad̄aba baaka duksa umele á jauje ge Dadaamiya an yaikkire, geni á za waḍa an ṅane maa, a naba zu waḍa á ba an ire-aara. ¹⁴ A zu waḍa, a ba ṅane: Ba jirire yá de gakar barka-aaruwa. Yá de

yákteya ba kwakya. ¹⁵ Ibrahim a naba fetarhe áte elva na a ndasaa Dadaamiya, a faa ervaunŋde jipu ge eppaka-aara, daaci shansha duksa ŋanna a ba Dadaamiya á de vanteva na.

¹⁶ Má emndimagwaha tá za waɗa, tá zaná an duksa na jauje ge ndzedɗa-aatare. Zá waɗa wá, á zlansauzle ge elva-aha baɗemme, emnde keni tá tsaatse á ba átekwa. ¹⁷ Daaci Dadaamiya a naba zu waɗa, á kátá maraterán ge emnde na a ŋuɗateraa namána na, geni á de emmága duksa na a ndasaa ŋane ŋanna, á eptseka elva ɗekideki. ¹⁸ Namána na a ŋuɗanaa Dadaamiya, antara waɗa na a zanaa ŋane na maa, duksa-aha buwa ŋanna a ndasaa Dadaamiya na wá, baaka pekyaa-aara, Dadaamiya á zeka waɗa á fida ɗekideki. Daaci miya emnde na mi se shaa ire á miya am sera á Dadaamiya na wá, una á vamite ndzedɗa jipu geni mí njantenja tama á miya áte duksa na a ba Dadaamiya á de vamiteva na. ¹⁹ Táma á miya áte duksa ŋanna wá, á tsáná ba ŋane shifa á miya degdege, geni a dzalamiyefka áte unjule á Dadaamiya. A weramiyanta ba ŋane kacakaca á dzegwa na ta icanse mashidi an ŋane na, ge de katafke á Dadaamiya. ²⁰ Yaisu wá, ŋane dedde á katafke á miya, á dem tate ŋanna aɗaba miya. Ba ŋane una *liman á miya yaikke áte limanire á Malkisadaka, liman yaikke dem ba ge ɗekideki.

7

*Malkisadaka *liman yaikke, slekse yaikke*

¹ Malkisadaka ŋanna wá, ŋane ndza slekse yaikke am Salaam, zlaŋbe adaliye ndza *liman á Dadaamiya Saksage. Vacite umele wá, Ibrahimima a dem wáva, a de ceŋaa slekse-aha umele. Átire sa wá, a naba de yainuhe ge liman Malkisadaka, a gan barka. ² Daaci Ibrahimima a de sanse luser am nalmane-aara baɗemme, a vante ge liman Malkisadaka. Emtsaade wá, zhera á Malkisadaka ŋanna wá, amaana slekse na tsaate áte jirire. Ŋane ndza slekse am Salaam. Salaam na maa, amaana hairire. ³ Ŋane, baaka ura diyaadiya eddenara antara emmenara, baaka jeba-aara, baaka ura diyaadiya fakta á shifa-aara antara halavuwa á shifa-aara. Ba seke una wakita á Dadaamiya á ndaaka fakta-aara antara halavuwa-aara na wá, ba seke ŋane wá, liman na aŋkwa ma vaatara keni. Ŋane gevge gáraŋa á Yaisu *Egdza á Dadaamiya.

⁴ Diyaweddiye geni Malkisadaka wá, liman yaikke. Ibrahimima ŋane una eggyemiya baɗemme a sanse luser am duksa na a zanaa am wáva baɗemme, a vante ge ŋane. ⁵ Diyamidiya geni emnde umele am eggye-aha á Laiwi garevge liman-aha. Am *tawraita á Muusa wá, a ba Dadaamiya á elvan ge itare wá, dawmbare á deza egdzara á *Iserayiila-aha, a varakurteva luser na tá sansa am nalmane-aatare baɗemme. Amaana luser ŋanna tá de lyiyaná á ba áza emnde a larde-aatare, itare keni ta ba eggye-aha á Ibrahimima. ⁶ Amá Malkisadaka wá, ŋane ura a emnde á Laiwi ka, aley a lyeŋaa luser áza Ibrahimima. Ibrahimima ŋane edda una Dadaamiya a ŋuɗŋaa namána antara ŋane geni á de vante

duksa. Amá ba Malkisadaka una a gar barka. ⁷ Adaliye, diyamidiya geni edda una á gar barka ge ura wá, yaikke ba ɲane arge edda una a shaa barka. Daaci yaikke ba Malkisadaka arge Ibrahimia. ⁸ Zlaɓe á daliye, baɗemme á liman-aha na ta segáshe am jeba á Laiwi, tá lyiyaná itare luser áza emnde a larde-aatare na wá, itare keni tá emtsa ba seke emnde baɗemme. Amá Malkisadaka wá, a ba wakita á Dadaamiya ɲane aŋkwa an shifa. ⁹ Daaci ba Laiwi na eggye-aha-ɲara tá lyiya luser áza emnde na keni, ba seke a vante luser-aara ge Malkisadaka, aɗaba eggyeɲara Ibrahimia a vante luser-aara ge Malkisadaka. ¹⁰ Amaana, am laukte na Ibrahimia a vante luser ge liman Malkisadaka na wá, wulfe-aha-aara baɗemme á ba am ɲane emtsaɗe. Daaci ba seke Laiwi antara egdzara-aara na á de yaterá ɲane na keni varanteva.

¹¹ Dadaamiya a vaterte *tawraitá ge emnde-aara Iserayiila-aha keni á ba áte erva an liman-aha na tá segashe am emnde a jeba á Laiwi, amá slera á limanire na ndza ta maganaa emnde á Laiwi hyefka, dzegwaranka magannaamaga ge Dadaamiya názena a katanaa ɲane. Ma andze dzegwarándzegwa wá, ma baaka wedera-aatare an liman umele yaikke seke Malkisadaka. Ma andze dzegwarándzegwa wá, baɗemme á liman-aha ma tá segashe á ba am eggye-aha á Laiwi seke *Haruna. ¹² Má Dadaamiya mbedesembede limanire á emnde á Laiwi an liman umele wá, daaci tawraitá keni á de ept-santeptsá. ¹³ Náwa namiyanna geni limanire, a eptsaptehe ba estuwa. Yaakadada Yaisu na ɲá

aŋkwa á ndaha elva-aara áhuna na keni, ɲane ura jeba á Laiwi ka, jeba-aara ba tsekemme. Ba ura palle keni jarka am emnde a jeba-aara una gevge liman, a daa sadake á de katafke á Dadaamiya. ¹⁴ Diyamidiya geni Yaisu wá, ɲane a jesare am dagave á emnde a jeba á Yahuda. Am laukte na Muusa á ndáhá elva á liman-aha na wá, tsalaaka jeba ɲanna dekideki.

**Liman yaikke áte limanire á Malkisadaka*

¹⁵ Náwa mí dise áte una, geni ba jirire ndza hyefka limanire á emnde á Laiwi, adaba Dadaamiya a fanem slera á limanire ɲanna am erva ge Yaisu, ɲane keni ba ura jeba umele seke *liman Malkisadaka. ¹⁶ ɲane gevka liman yaikke áte nade á liman-aha, amá a gev liman yaikke adaba an hakuma ge nja an shifa dem ba ge dekideki. ¹⁷ Adaliye a ba wakita á Dadaamiya: Ekka ká liman yaikke dem ba ge dekideki seke liman Malkisadaka. ¹⁸ Dadaamiya a naba yaa nade á liman-aha adaba hyefka, cekwa hakuma-aatare ge melateru ge emnde. ¹⁹ An nade á limanire wá, emnde dzegwaránka shá dzayyire á ervaunɲe á katafke á Dadaamiya. Amá kina wá, aŋkwa edda una ni jateruje ge liman-aha werre. Máki má aŋkwa fa tama á miya áte ɲane wá, á de vamiťa ɲane barama ge de katafke á Dadaamiya.

²⁰ Zlabe adaliye maa, am sarte na ni watse Dadaamiya á de far slera á limanire ge Yaisu na wá, a zu wada emtsaade, geni Yaisu á de gev liman yaikke, amá ge liman-aha umele wá, magaaka estuwa. ²¹ Amá ge Yaisu wá,

Dadaamiya a zanu waɗa, a ba ṅane: Yá etpseka elva-aaruwa dammaru ká njá liman dem ba ge ɗekideki. ²² Máki Dadaamiya a zu waɗa es-tuwa wá, amaana aɗaba Yaisu wá, shamiyansha namána áza Dadaamiya jauje ge namána-aara werre na.

²³ Anḳwa jawapa umele. Liman-aha werre wá, ndza ta vayye, ba á emtsa una, á eksaná una slera á limanire, á emtsa una á eksáná una slera á limanire. ²⁴ Amá limanire á Yaisu wá, ɓaaka tsa-aara, aɗaba ṅane á emtseka ɗekideki. ²⁵ Daaci ma vaatara keni á dzegwándzegwa lyaterlya emnde na tá yeka an zhara-aara na baɗemme, aɗaba ṅane anḳwa an shifa dem ba ge ɗekideki, sledagave-aatare an Dadaamiya.

²⁶ Ba ṅane una liman yaikke, a hyevhye ge wedera á miya baɗemme. ṅane dzayye huɗe-aara, gauka haypa ɗekideki, ṅane cudedɗe am duksa baɗemme, anḳwa dagave-aatare antara emnde a mága haypa, ṅane anḳwa áza Dadaamiya am samaya. ²⁷ Liman-aha werre wá, ba kelaazare sey ta dánda sadake á ire-aatare emtsaade á deza Dadaamiya geni á yateraarye haypa-aha-aatare, lauktu tá dá náza á emnde geni a yateraarye Dadaamiya ge itare keni. Amá Yaisu wá, ṅane magaaka slera á limanire-aara áte una ṅanna ɗekideki. A magaa sadake-aara ba ser palle á katafke á Dadaamiya an shifa-aara, hyevhye geni Dadaamiya á yateraarye ge emnde baɗemme. ²⁸ Emnde na ndza ta faterar slera á limanire áte una a ndanaa *tawraita á Muusa wá, ta ba emndimagwaha, tá naba mbeɗa ádaliye á dem haypa, nampire-aara á

de haraaka, á de keda ba dekideki. Amá am sarte na Dadaamiya a zu wada geni Egdza-aara á de gev liman yaikke na wá, a eptsante am sarte nanna tawraita keni. Daaci a vante slera á limanire ge Egdza-aara, nane hyevhye am duksa bademme dem ba ge dekideki.

8

*Yaisu *liman á miya yaikke*

¹ Náwa una wá, jirire á elva-aha na njá anƙwa tsakaná nɛre bademme na: Miya wá, shamiyánsha *liman yaikke zlaazlala á dem samaya, anƙwa á njá am naɗafa á Dadaamiya na ni nane slekse arge duksa bademme na. ² Nane anƙwa á maga slera á limanire-aara am tate na cuɗeɗe jipu, Dadaamiya á njá amƙwa na. Werre wá, liman-aha ndza ta magaa slera á limanire-aatare á ba am *mashidi á kacakaɗa ta maganaa ba emnde. Amá Yaisu wá, nane anƙwa á maga slera á limanire-aara am samaya, am mashidi á jirire na a maganaa Dadaamiya.

³ Bademme á liman-aha wá, ta fater ba ge dá sadake-aha gergere á de katafke á Dadaamiya. Daaci shagera ba liman á miya yaikke na keni á dánda sadake á de katafke á Dadaamiya.

⁴ Ma andze nane anƙwa áte duniya wá, ma andze á maƙa slera á limanire dekideki, aɗaba tá anƙwa liman-aha umele ge dá sadake á de katafke á Dadaamiya áte una á ndaná *tawraita á Muusa. ⁵ Liman-aha nanna, tá maga limanire-aatare am mashidi, amá una nanna ba garava á mashidi á jirire na am samaya na. Am sarte na

ni watse Muusa á de maga mashidi á kacakaca wá, a ba Dadaamiya á elvan ge ɲane: Eccena ba shagera, de emmága á ba áte una ya kwarakkaa iya átire á wa na. ⁶ Daaci náwa namiyanna bademme geni slera na a faara Dadaamiya ge Yaisu, jauje ge náza á liman-aha bademme. Namána na ta shanaa emnde áza Dadaamiya adaba Yaisu na jauje ge namána werre. Adaba duksa na Dadaamiya a ɲgudaamiya namána-aara na, jauje ge una werre.

⁷ Ma andze hyefhye namána werre wá, Dadaamiya keni ma á maŋka umele. ⁸ Amá diyamidiya geni namána werre na hyefka dekideki, adaba emnde yaránka mága haypa. Daaci Dadaamiya aŋkwa á valaterarvale, á ba ɲane á elvan ge itare:

Cenaucena una ba shagera: aŋkwa á sawa zámame na ni yá de ɲgudaterá namána-aaruwa aŋwaslire ge emnde á *Iserayiila antara ge emnde a Yahuda.

⁹ Una ɲanna gergere antara namána na ndza ya ɲgudater ge eggye-aha-aatare werre am sarte na ya saterse am larde á Misera na. Itare dábarka namána-aaruwa, mele iya keni fanateruka hyema. Una ya ndanaa ba iya ya Yaakadada.

¹⁰ Náwa yá de maganá estuwa namána-aaruwa antara emnde a Iserayiila: yá de faterem shairiya-aaruwa am makhyakhya-aatare, yá de magaterá ɲgurna geni a seseka am ire-aatare dekideki. Yá de gev Dadaamiya-aatare, itare keni tá de gev emnde-aaruwa.

- ¹¹ Am sarte ŋanna wá, watse baaka wedera á emnde ge de balaterá zhera-aaruwa ge emnde, adaba an male-aha ka, an egdzara ka, bademme á emnde tá de diyisediye.
- ¹² Adaba yá de zatervarze am haypa-aatare, yá de ŋaterka am ervaunŋde dƣekideki.
- ¹³ Kwaya ŋane názu a ndanaa Dadaamiya am namána anwaslire. Daaci diyaweddiye ganakini Dadaamiya a ganve namána werre ba seke emgyegwe a duksa. Má duksa gevege emgyegwe wá, cekwa nampire-aara, á de haraaka, á de keda ba dƣekideki.

9

*Tara slera á *liman-aha am duniya antara náza á Yaisu am samaya*

- ¹ Am namána á zunŋwire wá, Dadaamiya a vaterte shairiya-aha-aara ge emnde, geni tá dabaná áte una ŋanna am jahava-aatare á katafke-aara, adaba ndza anƣkwa mashidi ta maganaa itare ge njála Dadaamiya am huƣe-aara.
- ² Ta magaa mashidi an kelise, ta fem mekere am huƣe-aara an kacakaca á dzegwa. Mekere na á sete we-aara na wá, ta dƣahanaa an sleƣe cuƣeƣe. Am huƣe-aara tá fa kára á fanus an nara vuye, antara tabel, depain cuƣeƣe átekwa, tá fan ge Dadaamiya.
- ³ Am mekere ge buwire am ice á kacakaca á dzegwa na wá, ta dƣahanaa an sleƣe na cuƣeƣe jipu na.
- ⁴ Am huƣe á una ŋanna keni maa, ta magaa tate á dƣiza kajiji á katafke á Dadaamiya, ta maganaa an dindar bademme, antara nakwati, ŋane keni ta baranaa an dindar ŋanna. Nakwati ŋanna

wá, tá yeha namána á Dadaamiya átekwa. Am nakwati ɲanna maa, aɲkwa erba á dindar. Am erba ɲanna maa, ta fem dafa na ndza a vatertaa Dadaamiya á sawa am samaya am sarte na ndza ta am kaamba na. Aɲkwa zlaɓe zade á *Haruna na ndza a magaa hyema na, antara naláwa-aha á nakwa buwa na ndza Dadaamiya a puwaterte shairiya-aha-aara átekwa na. Baɗemme á una-aha ɲanna tá á ba am nakwati ɲanna. ⁵ Ate nakwati ɲanna maa, ta magaa garava á malika-aha buwa. Amaana, ba Dadaamiya an ire-aara keni aɲkwa am tate ɲanna. Lyambake á malika-aha ɲanna ta jamme tekeppe áte ire á tate na male á *liman-aha á de teɗantá uzhe á sadake ge Dadaamiya, geni á yateraarye ge emnde na. Amá kina wá, ɲá dzegwánka emtsaade palakura jirire-aara baɗemme.

⁶ Am sarte na zlaruzle am mága mashidi ɲanna baɗemme maa, liman-aha ta duwa ba ke-laazare á dem mekere ge zuɲɲwire na ge mága slera-aatare. ⁷ Amá á dem mekere ge buwire na wá, sey á duwa ba male á liman-aha palle. A duwa ɲanna keni sey ba ser palle am sakanderi. Má á duwa keni maa, á duwa an uzhe á dabba am erva á danán ge Dadaamiya, geni Dadaamiya á yateraar haypa-aha-aatare, ɲane antara emnde á Dadaamiya baɗemme. ⁸ Náwa názu á kwaramisa Shedekwe Cudɗɗe an duksa-aha ɲanna: Máki zlaɓe aɲkwa mekere á zuɲɲwire am mashidi ɲanna wá, zlaɓe baaka barama ge dem sleɗe na cudɗɗe jipu na. ⁹ Duksa-aha na tá maganá emnde sem vatená na wá, tá maga ba garava una mí zharaná miya kina.

Bademme á sadake-aha ṅanna, á dzegwánka baraterá ervaṅde ge emnde. ¹⁰ Una ṅanna á kwaraterse ba elva á náza za, geni a zarza una, a zarka una, antara elva á náza sha, ira elva á tseḍaṅṅire. Bademme á shairiya-aha ṅanna ba iga-aara emtsaade, dem sarte na Dadaamiya á de mbadesembaade duksa bademme aṅwaslire.

¹¹ Kina wá, samsa Yaisu *Almasiihu, ba ṅane una male á *liman-aha bademme, a sanaa ba ṅane duksa shagera na mi shanaa miya áza Dadaamiya. ṅane aṅkwa á maga slera-aara am tate na jauje ge mashidi á kelise na ndza ta maganaa emndimagwaha werre na. Ta maganaa emnde ka tate ṅanna, una ṅanna slera á Dadaamiya an ire-aara. ¹² Am sarte na Yaisu a duwa á dem tate na cuḍeḍde jipu na wá, daaka an uzhe á usale, bi an uzhe á egdze á dalau, amá a duwa an uzhe á ire-aara ba ge ṅane. A demhe ba ser palle, daaci hyevhye ge lya emnde bademme dem ba ge ḍekideki.

¹³ Itare ba ta icetaa usale, bi egdze á dalau, daaci ta ucaterve uzhe-aara ge emnde na ḍabaraaka shairiya á Dadaamiya, bi ta icetaa gyaale á esla, ta deraahe an kára, ta kutaterva kelpakara-aara. Má magarnaamaga bademme áte una á ndahaná *tawraita wá, ma ware una ndza a dzaleve áte shairiya á Dadaamiya keni, an bara haypa-aara. ¹⁴ Daaci má uzhe á dabba ndza an hákuma estuwa ge bara haypa, sakwa uzhe á Yaisu Almasiihu emtu? Yaisu keni baaka duksa mándzawe áte ṅane ḍekideki. An hákuma á Shedekwe Cuḍeḍde na á nja ba ge ḍekideki na, a naba yanaa shifa-aara ge Dadaamiya. Uzhe-aara

na a puwanvaa ɲane na wá, á baramiyá haypa ge miya, á ekhyamiya ervaunɗe geni mí maganá slera ge Dadaamiya Saksage.

¹⁵ Adaba una ɲanna, Yaisu wá, slemela emnde ba ɲane antara Dadaamiya. Ba ɲane una á mará namána anɲwaslire na a ɲgudateraa Dadaamiya ge emnde na. Adaba una ɲanna, bademme á emnde na a dzeratersaa Dadaamiya geni ta emnde-aara na, tá de lyevaalye duksa shagera na a ba Dadaamiya am namána-aara, á de vaterteva na. Duksa ɲanna ba seke ta zu am warita, baaka slelyatervulye d'ekid'eki. Tá de shá una ba seke warita adaba emtsa á Yaisu Almasiihu. An emtsa-aara ɲanna, a de lyatersaa ɲane emnde am haypa na ta maganaa itare werre, am sarte na tá d'aba emgyegwe á namána.

¹⁶ Má anɲkwa ura a yaa nasherire á nalmane-aara, geni má de kedaakeda ɲane, tá de teganá emnde-aara áte una a ndasaa ɲane wá, sey tá paka ba má kedaakeda ɲane emtsaade, lauktu tá tega warita ɲanna. ¹⁷ Má edda una a ndaase nasherire á nalmane-aara na tá de záná emnde am warita na zlaɓe á ba an shifa-aara wá, baaka ura á maga názena a ndasaa ɲane na, sey má kedaakeda ɲane, lauktu tá emmága.

¹⁸ Ba namána á zunɲwire na ndza a maganaa Dadaamiya werre na keni, sey máki jarja dabba emtsaade, lauktu á gevge duksa na a ndasaa ɲane na. ¹⁹ Am sarte ɲanna maa, nabi Muusa a palaternaah'e shairiya-aha á Dadaamiya na am *tawrait'a na bademme ge emnde. Daaci a eksante uzhe á egdzar esla-aha, antara usale-aha, a kante yawe, a icevaa erva á nafa umele

tá ḏahaná an isaup, antara úgje á duksa umele haṅje. Daaci a wecanve uzhe antara yawe na ge wakita á *tawraita, a wecaterve ge emnde na tá katafke-aara keni baḏemme. ²⁰ Am iga a una ṅanna maa, a ba ṅane á elvan ge itare: Una na wá, uzhe na Dadaamiya a magaa namána an ekkure an ṅane, tsufautsufa ba shagera. ²¹ Zlabe ádaliye, nabi Muusa a de wecanve uzhe na ge mashidi na ta maganaa an kelise na, antara ka-zlaṅa á mága slera á limanire na am huḏe-aara na baḏemme. ²² Áte názena á ndaná *tawraita wá, cekwa duksa na tá wecanveka uzhe na geni tá ganvege cuḏeḏe á katafke á Dadaamiya. Má puwaraaka uzhe wá, Dadaamiya á yateraarka haypa ge emnde ḏekideki.

*Yaisu *Almasiihu a bezateraa haypa ge emnde an uzhe á ire-aara*

²³ Ate una á ndaná *tawraita á Muusa wá, má jarejja dabba wá, ma uwe keni tá naba ganvege cuḏeḏe an uzhe-aara. Amá a viyamiyarka geni slera á limanire zunṅwe na wá, ndza ba garava-aara ge jirire á duksa na am samaya na. Jirire-aara na am samaya na wá, sey uzhe na jauje ge uzhe á dabba, una ṅanna uzhe á Yaisu *Almasiihu. ²⁴ Náwa cenamiyancena geni Yaisu Almasiihu demde á dem tate na cuḏeḏe jipu na. Amá wá, am mashidi á kelise na ndza ta maganaa emndimagwaha ka, una ṅanna ndza ba garava-aara ge jirire á tate na Dadaamiya á njá ámkwa na.

ṅane zlaazlala á dem samaya, tate na Dadaamiya á njá átekwa na. Kina wá, ṅane

aŋkwa á katafke á Dadaamiya, aŋkwa á magamiya wedera á miya bademme. ²⁵ Male á *liman-aha wá, ñane ba kelaa sakanderi á duwa an uzhe á dabba á dem tate na cufedde jipu na. Amá Yaisu wá, ñane daaka an uzhe á dabba á de katafke á Dadaamiya. Ñane a yaa shifa-aara sadake ge Dadaamiya, a magaa ba ser palle ñanna, daaci hyevhye náza á dem ba ge deki. ²⁶ Ma andze a magaa sadake-aara ser kwakya wá, kwaye am fakte á duniya dem halavuwa-aara keni, ma andze á sha ba zlada. Amá, a shu zlada-aara ba ser palle. A semhe ba ser palle ñanna herzhe an halavuwa á duniya na, a se yaa shifa-aara sadake ge Dadaamiya, geni ma vaatara keni, á barateraabara haypa-aha-aatare ge emnde, baaka hákuma á haypa mazla-aara. ²⁷ Bademme á emnde, ma ware keni á de emtsa ba ser palle. Am iga á emtsa maa, tá de katafke á shairiya á Dadaamiya. ²⁸ Yaisu *Almasiihu keni a emtsa ba ser palle. A yaa shifa-aara sadake ge Dadaamiya, geni á barateraabara haypa-aha-aatare ge emndimagwaha. Á de sawa zlabé ádaliye, amá sawa-aara ñanna wá, á se baraterá haypa ka mazla-aara ge emnde, amá á se enzla ba emnde na ni tá aŋkwa ufa ñane na.

10

¹ Shairiya-aha na am *tawraitá á Muusa na wá, á maramiya ba gárava á duksa shagera na mi shanaa miya kina. Shairiya-aha ñanna, ba garava-aara ka wá, jirire-aara ka. Male-aha á *liman-aha wá, ba kelaa sakanderi icaranseka deki ge dá sadake á de katafke á Dadaamiya

am tate na cuƙeƙe jipu na. Má estuwa wá, una á dzegwánka ƙeƙeƙe melateru ge emnde geni tá gevge cuƙeƙe á katafke á Dadaamiya. ² Ma andze emnde tá shansha cuƙeƙe náza dem ba ge ƙeƙeƙe aƙaba sadake ɲanna wá, ma andze á enzleka ervaunƙe-aatare mazla-aara áte elva á haypa, ma andze tá ádalika á maga sadake mazla-aara. ³ Amá sharánka una ɲanna, baira ƙeme sadake-aha ɲanna á yehaterante haypa-aha-aatare ba kelaa sakanderi. ⁴ Aƙaba uzhe á dalau antara uzhe á usale á hyefka ƙeƙeƙe ge bárá haypa.

⁵ Aƙaba una ɲanna, am sarte na samsa Yaisu *Almasiihu á sem duniya, a ba ɲane á elvan ge Dadaamiya:

Uzhe á dabba antara sadake-aha umele, baaka wedera á ɲa an ɲane. Aƙaba una ɲanna ka give urimagwe, geni yá se yá shifa-aaruwa á katafke á ɲa.

⁶ Sadake á dabba-aha na tá epshaká emnde, antara sadake á bara haypa na wá, baaka wedera á ɲa an ɲane mazla-aara.

⁷ Ya ndaaka aƙaba una: Náwa iya, Dadaamiya-aaruwa, sanemse á sem duniya, ya se maga názena ká kataná ka, ba seke una ta puwete am wakita á ɲa arge iya na.

⁸ Am zunɲwire keni, a ba Yaisu á elvan ge Dadaamiya: «Uzhe á dabba-aha antara dabba-aha na tá epshaká emnde na, antara sadake á bárá haypa, ira sadake-aha umele, una-aha ɲanna baƙemme higakarka.» Sadake-aha ɲanna tá magáná á ba áte una á ndaná *tawraita tsa kalkale, aley Dadaamiya lyiyaaka. ⁹ Daaci á

ba ɲane zlaɓe ádaliye: «Náwa iya sanemsa á sem duniya, ya se maga názena ká kataná ka.» Elva-aara ɲanna wá, á palaamiyá una ni Dadaamiya á lyyeƙa sadake werre na mazla-aara, a naba mbedese an sadake umele. ¹⁰ Miya wá, gamiyevge emnde cufedde á katafke á Dadaamiya, adaba Yaisu *Almasiihu maganaa-maga názena á kataná Dadaamiya, a yaa shifa-aara ba ser palle sadake na.

¹¹ Baɗemme á *liman-aha wá, ma ware-aatare keni má daada áte ɲane, ba kelaazare baaka njinja-aatare defeƙeƙe am slera-aatare ge fa sadake-aha á emnde á katafke á Dadaamiya. Sadake-aha ɲanna keni baraaka haypa á emnde defeƙeƙe. ¹² Amá Yaisu Almasiihu ɲane a naba yaa shifa-aara sadake ge Dadaamiya. Ba ɲane una an hakuma á baraterá haypa ge emnde dem ba ge defeƙeƙe. Am iga a una ɲanna maa, zlaazlala á dem samaya, aŋkwa á njá am naɗafa á Dadaamiya, ¹³ á páká sarte na ni Dadaamiya á de gatervege kelaade-aha-aara tate á puwa sera-aara na. ¹⁴ An sadake-aara ɲanna ndza a maganaahe ba ser palle na wá, a baraterse an una ɲanna ervaunɗe ge emnde na a dzeratersaa ɲane, garevge emnde cufedde náza á dem ba ge defeƙeƙe na.

¹⁵ Sheɗekwe Cufedde keni aŋkwa á bamiyanba geni ba sadake-aara palle una hyevhye. Adaba ndza a ba ɲane:

¹⁶ A ba Yaakadada Dadaamiya: Náwa ɲane duksa na am namána-aaruwa yá de magaterán ge emnde-aaruwa: am sarte ɲanna yá de ɲaternaaja shairiya-aha-aaruwa

am ire-aatare, yá de magaterá pute geni á seska am eŋkale-aatare dekiŋdeki.

17 Daaci a ba ɲane zlaɓe ádaliye: Yá de yateraarye haypa-aha-aatare, yá de ɲaterka am erwaunde mazla-aara. 18 Máki yateraarye Dadaamiya ge emnde wá, elva a sadake umele baaka mazla-aara.

Gaumiyaptege á deza Dadaamiya

19 Egdzar mama-aha-aaruwa, kina wá, baaka názu á piyamite ge dem tate na ni cudeŋde jipu na. Adaba Yaisu a puwaa uzhe-aara adaba miya. 20 Yaisu ɲane a naba tanve kacakaca á dzegwa na ni ndza am dagave á miya antara tate na cudeŋde jipu na. A vamitaa ɲane baráma á dem tate ɲanna, geni mí shansha shifa na á zleka na. Kacakaca á dzegwa na a tanvaa ɲane na wá, amaana vuwa-aara ba ge ɲane. 21 Miya, shamiyansha *liman yaikke, á kwaraterá ɲane emnde na tá am huŋde á há á Dadaamiya bademme. 22 Ba seke una ni Yaisu a weramiyante barama na wá, mi zlalawa á de katafke á Dadaamiya an erwaunde á miya palle, magaumika shaige dekiŋdeki. Adaba Yaisu a baramise erwaunde an uzhe-aara, a baramive an yawe tseŋɲe. 23 Yaumiyanka mága seydire á shifa na á zleka na, a ba Dadaamiya á de vamiteva na. Adaba má ɲane ndaasendaha elva wá, á eptseka elva-aara dekiŋdeki. Daaci naba faumitarfe á ba áte názena a ndasaa ɲane, magaumika shaige dekiŋdeki. 24 Magaumimága wáyáviŋre am dagave á miya, ma ware keni a fanemfa ndzeŋa am

vuwa ge ukfeŋara, geni a emmága shagerire antara wayavire ba kelaazare. ²⁵ Náwa emnde umele mbarsembe icanse sem jahava, una ɲanna shagerka ɔfekideki. Daaci yaumiyanka jahava átirpalle, ma ware keni a fanemfa ndzeɗa am vuwa ge ura. Aɗaba diyakurdiya geni herzhapteherzhe sawa á Yaakadada Yaisu.

²⁶ Má ura diyaadiya jirire á Dadaamiya, aley á maga ba haypa an niya wá, baaka sadake na ni á de barannaabara haypa-aara ɲanna. ²⁷ Má ura á maga jeba á haypa ɲanna wá, sey á njá á ba an lyawa, aɗaba Dadaamiya aŋkwa eppaka an shairiya, á de záterá kara á jahanama antara kelaade-aha á Dadaamiya umele. ²⁸ Diyakurdiya geni má ura cuɗucude *tawraita á Muusa, emnde buwa bi keye naranna an ice-aatare átire á maga duksa ɲanna wá, daaci tá já ba shifa-aara, tá zanvarka ɔfekideki. ²⁹ Má bikere á edda una a cuɗu tawraita á Muusa ni estuwa wá, náza á edda una a epsawaa *Egdza á Dadaamiya antara Shedekwe Cudedeɗe na á magaminá ɲane ɲgurna á ɗaba Dadaamiya na, á tsaaka an una ɲanna. Aɗaba edda-aara a zharaa uzhe á Egdza á Dadaamiya na ba seke duksa ba dey. Uzhe na ni Dadaamiya a ɲgudateraa namána an ɲane ge emnde baɗemme, ɲane keni a baranaa ba uzhe ɲanna tsa. ³⁰ A ba Dadaamiya á ba an ire-aara wá:

Diyandiya ya zlaɗa na ni yá de faara ya ge edda una má kwalevkwale ge ɗabidɗaba na. Yá de pelatersepele mandzawire na tá maganá itare baɗemme.

Diyamiyeddiye ganakini má Dadaamiya

ndasendahe elva-aara wá, sey á ganvege. Zlabe ádaliye, aṅkwa an puwa am wakita á Dadaamiya, a ba ṅane: Ba Yaakadada una á de maga shairiya á emnde-aara. ³¹ Dadaamiya wá, ṅane edda á shifa. Daaci watse laruwa ge edda una ni má de ṅanaaṅa shairiya á katafke-aara.

³² Yehanteyeha midalire na kwa maganaa kure werre am sarte na lyakurvalya Yaisu. Kwakya zlaḍa na ndza kwa shanaa kure áza emnde, aley kwa naba bashuhe. ³³ Aḍaba am sarte umele, ta zlazlakurzlázle emnde á katafke á zlamaha, magarakuránmaga laruwa kwakya. Am sarte umele zlabe ádaliye, kure shakuransha ire á kure, kwa de ekhyateraa ervaunḍe ge emnde na tá am jeba á zlaḍa-aha ṅanna. ³⁴ Kwa de zatervaare ge emnde na tá am dangay aḍaba zhera á Yaisu. Am sarte umele ta naba lyevaa nalmane á kure emnde an ndzeḍa, aley kwa naba yateranhe á ba an higa, aḍaba diyakurdiya ganakini kure shakuransha una ni jauje ge nalmane-aha umele bademme, nalmane na a zleka dekideki na. ³⁵ Fakurantaufe fetarfire á kure shagera, daaci yawánka. Naba fautarfe áte Dadaamiya. Aḍaba edda una má kezlanveka fetarfire-aara, á de shá laḍa yaikke áza Dadaamiya. ³⁶ Estuwa, shagera ba kwá farvaunḍe, kwá maga názena á kataná ṅane, lauktu á de vakurte duksa na a ndanaa ṅane na. ³⁷ Aḍaba a ba wakita á Dadaamiya:

A juwa ba cekwaanḡuḍi, aṅkwa á sawa edda una ni mí pakaná miya na, á shekwaaka mazla-aara.

³⁸ Edda una dzayye ervaunḍe-aara, á de shá shifa na á zleka na, má kezlanveka fetarfire-

aara áte iya dem halavuwa-aara. Amá edda una kezlanvekezle fetarfire-aara wá, yá de higarka ge ŋane.

³⁹ Amá miya wá, tamanka ganakini mí de geva am dagave á emnde na tá aŋkwa eptsá á dem kataliye am fetarfire-aatare, tá átira keŋa na. Miya wá, aŋkwa fetarfe á miya áte Dadaamiya, daaci mí shansha shifa na á zleka na.

11

Fetarfire á emnde á Dadaamiya werre

¹ Fetarfire na wá, amaana njeta áte duksa na á tamaná ura, geni duksa ŋanna á de gevge ba jirire na. Ma á nánka duksa ŋanna an ice-aara keni, diyaadiya geni baaka shaige am huŋe-aara.

² Emnde á Dadaamiya werre keni ndza ta fetaare ba estuwa áte ŋane. Adaba una ŋanna ndza hayaterhaya Dadaamiya.

³ An fetarfire á miya mi diyeddiye geni duksa bademme wá, ndza a nderanaa ba Dadaamiya an elva-aara. Daaci bademme á názu aŋkwa á zharaná ice á ura na wá, a nderanaa ba Dadaamiya an názu á taa nánka ura.

⁴ An fetarfire ŋanna, Habila a vante sadake á nasherire-aara ge Dadaamiya jauje ge una a vantaa Kayinu. Adaba fetarfire-aara wá, Dadaamiya a naba vante jirire. Dadaamiya lye-vaalya sadake-aara, a naba maranánhe ganakini hayanhayire. Daaci Habila ŋanna wá, ma emtsamtsa ba ŋane keni, labare-aara á eksa ba slera sem vatená, adaba fetarfire-aara.

⁵ Á ba an fetarfire ŋanna, Anuhu ndza nánka emtsa dekiŋeki, a naba kapte á dem samaya an

vuwa-aara bademme, puwarteka ice áte ɲane dekideki, adaba danda Dadaamiya ba estuwa. A ba wakita á Dadaamiya wá, Dadaamiya ndza hayanhaya Anuhu ɲanna, daaci a naba eksante ba estuwa. ⁶ Baaka duksa na ni ura á shá haya an ɲane áza Dadaamiya sey á ba an fetarfire palle. Ma ware una á seza Dadaamiya keni, sey á fetarfe geni Dadaamiya wá, aɲkwa ba jirire. Sey á diyeddiye geni Dadaamiya á yaterka emnde na ni tá aɲkwa ganáptega ge ɲane.

⁷ Á ba an fetarfire ɲanna *Nuhu keni ndza a fansarfe ge Dadaamiya. Dadaamiya a balanse elva-aara am wahayu, zlaɓe nánka tsa duksa ɲanna emtsaade, amá a naba fansarhe. A naba nderaa paare á yawe yaikke áte una a kwaransaa Dadaamiya am wahayu na. Daaci ta demhe antara emnde-aara bademme. A lyaterse estuwa Dadaamiya am yawe na ndza a balansaa ɲane. Adaba una ɲanna a naba marateranhe ge emnde geni ɲateraaja shairiya, adaba fartarka áte Dadaamiya. Amá ɲane wá, shansha jirire áza Dadaamiya adaba fetarfire-aara.

⁸ Á ba an fetarfire ɲanna zlaɓe ádaliye, ndza fansarfe Ibrahimia ge Dadaamiya. A naba duhe á dem larde na a bannaa Dadaamiya ge de nja amkwa, á de gev náza-aara larde ɲanna. Ba tate ɲanna keni ndza diyaaka emtsaade Ibrahimia, aley a naba duhe. ⁹ An fetarfire-aara a naba nja am larde ɲanna ndza a fannaa Dadaamiya ge ɲane am namana-aara. Ma gevka ekse-aara miyenne keni, a naba nja áhuwa. Ndza a nja á ba am *bere á kacakaca ba estuwa, lauktu

ta melsaa tara Isiyaaku antara Yakubu larde á namána ɲanna, itare keni ta nja á ba am bere á kacakaca ba estuwa. ¹⁰ Ibrahimia a fansaare estuwa ge Dadaamiya na wá, adaba njantenja am ervaunɗe-aara ganakini watse á daada á dem berni na a nderanaa Dadaamiya am samaya, baaka badza-aara ɗekidɗeki na.

¹¹ Saraatu keni ba estuwa. An fetarfire-aara a naba shaa huɗe, gevge emgyegwe á mukse tsa. Adaba diyaadiya geni Dadaamiya na a banaa watse á de vanta egdzere na, á iceka fida ɗekidɗeki. ¹² Adaba una ɲanna, ba Ibrahimia palle, ɲane una ndza gevge emgyegwe á zhele kurcumme, ndza baaka elva a ya egdzere ázeɲara mazla-aara, ba ɲane ɲanna wá, a naba yehe egdzere baaka kezlakula á eggye-aha-ɲara, ta ba seke shiili na am guwa na, ta ba seke terlyakwa na áte samaya.

¹³ Emnde á Ibrahimia ɲanna ta matsaa ba estuwa, yáranka fetarfire-aatare ɗekidɗeki. Amá itare an ire-aatare wá, pakarvaaka duksa-aha ɲanna ndza a baternaa Dadaamiya na. Duksa palle wá, ndza njarantenja am ervaunɗe-aatare geni baaka shaige áte názu a ndasaa Dadaamiya. Daaci ta higa jipu áte duksa-aha ɲanna. Baira ndza ta enndáhá ba parakke geni itare ta ba seke wayve-aha am duniya na, tate á nja-aatare miyenne wá, áhuna ka. ¹⁴ Emnde ɲanna, am nja-aatare wá, shebarka ɗekidɗeki ganakini aɲkwa larde-aatare ba giraara watse tá zláá á de njá am huɗe-aara. ¹⁵ Dzamarka ɗekidɗeki áte ekse-aatare na ndza ta segashe am huɗe-aara na. Ma andze tá kátá tate na ndza ta sawa átekwa

wá, sey ma tá shantaushe ge barama á eptsá á dehuwa. ¹⁶ Amá dzamarka itare una ɲanna ɗekideki. Itare wá, aɲkwa tate umele am ire-aatare, amaana: samaya. Una ɲanna jauje ge tate na ndza ta sawa átekwa na. Adaba fetarfire-aatare ɲanna wá, á wanka shaige ɗekideki ge Dadaamiya geni tá ɗáhá ɲane an Dadaamiya á emnde ɲanna, a tsatsateraa berni yaikke ázeɲara.

¹⁷⁻¹⁸ Á ba an fetarfire ɲanna zlaɓe ádaliye, Ibrahimá á kátá icaná egdza-aara palle ba ɲane sadake-aara ge Dadaamiya. A ba Dadaamiya á elvan ge ɲane: Iciyantice egdza á ɲa Isiyaaku sadake-aara. An elva-aara ɲanna wá, a se gya ba hala á Ibrahimá, adaba ndza a bantsa ba ɲane am namána-aara geni eggye-aha á ɲa, wulfe á Isiyaaku, tá de gevge kwakya. ¹⁹ Ibrahimá á kátá icetaa egdza-aara na wá, adaba diyaadiya geni Dadaamiya an hákuma á shifeta emnde a faya. Am sarte na Dadaamiya a naba piyante ge Ibrahimá na wá, Isiyaaku wá, ba seke a tsete am faya.

²⁰ An fetarfire, Isiyaaku a gaterar barka ge tara Yakubu antara Isuwa. Am gá barka-aara ɲanna wá, a bateraa názu á de magava á katafke. ²¹ An fetarfire ɲanna, Yakubu keni am sarte na gevge emgyegwe a juwa ba emtsa, a naba gaterar barka ge egdzara á Yusufa buwa. A tsetehe áte zade-aara, a galante Dadaamiya.

²² Á ba an fetarfire ɲanna, Yusufa keni am sarte na gevge emgyegwe a juwa ba emtsa, ndza a enndaha elva á segashe á emnde-aatare,

egdzara á *Iserayiila am larde á Misera. Ndza a kwaratersekware bademme náza na ni watse tá maganá an hyehye-aara má emtsamtsa ṅane.

²³ Tara eddeṅara antara emmeṅara ge Muusa keni ba estuwa. An fetarfire-aatare am sarte na yaireye Muusa, naránna geni zariya egdza-aatare, daaci magarka lyawa dekideki ge ya elva na a tsanaa sleksu *Firawna. Ta naba shebanvehe am mba dem tere keye.

²⁴ Adaba fetarfire ṅanna, am sarte na walte-wala Muusa, eksarka mazla-aara geni tá dahaná an eggyeṅara ge sleksu *Firawna. ²⁵ ṅane a hayaa ba tá shá zlaḍa átirpalle antara emnde á Dadaamiya, arge una ni á njá am geḍa am sarte cekwaṅgudí, amá slehaypa. ²⁶ Ndza diyaadiya geni ambane ba sha epsawa áza emnde adaba Almasihu na watse á belaná Dadaamiya á sem duniya na, arge una ni á zuze duniya an nalmane na an ndaaka am larde á Misera na. Adaba ṅane a fete ire-aara áte laḍa na á de vantá Dadaamiya na.

²⁷ Adaba fetarfire-aara ndza sessa Muusa am larde á Misera. Slekse á Misera jaaja ervaunde, amá ṅane magaaka lyawa-aara dekideki. Baaka lambe-aara ba seke ṅane aṅkwa á nanna Dadaamiya an ice-aara. ²⁸ Ba Muusa ṅanna zlaḍe ádaliye, adaba fetarfire-aara, a kwaraterse ge emnde a *Iserayiila geni a wecarweca uzhe á dabba áte wakiya-aha-aatare, geni malika na a se ceba makaji-aha na a demka á dem mba-aatare. Daaci Muusa a tsaa muṅri á una ṅanna tá aṅkwa emmága ba kelaa sakanderi. Tá dáhá muṅri ṅanna: *Paska.

29 Á ba an fetarfire ɲanna zlaɓe ádaliye, emnde a *Iserayiila ebzarubze haye kyaŋɲe áte shiili cakasse ba seke ndza ɓaaka yawe am guwa yaikke ɲanna, amá ba ta demhe ge emnde a Misera wá, a naba ndateruhe ge haye.

30 An fetarfire-aatare, ndza zazaraazaza emnde a Iserayiila dala yaikke na emnde a Yairikau ta jantaave ge ekse-aatare an ɲane. Ba kelaazare wá, ta de jantaave ser palle áte una ndza a kwaratersaa Dadaamiya. Am hare ge vuyire wá, zazaazaze dala yaikke ɲanna baɗemme.

31 Ndza aŋkwa mukse zaware umele, zhera-aara Rahab. Adaba fetarfire-aara áte Dadaamiya, a naba lyevaa emnde a Iserayiila na ta se gya nasherire á ekse-aatare á dem mba-aara. Daaci am sarte na emnde a Iserayiila ta cebaa emnde a ekse na wá, ta yaa ɲane an shifa.

32 Yá maganá estara kina? Adaba cekwa sarte ganakini yá palakurnaapala labare á fetarfire á emnde á Dadaamiya umele, seke tara Gidiyaun, Barak, Samsaun, Yaifta, *Dawuda, Samiyail, ira nabi-aha umele. 33 An fetarfire-aatare emnde ɲanna ndza garega ndzedá arge larde-aha umele. Baɗemme á názena ndza a baternaa Dadaamiya am namána-aara sharánsha an fetarfire-aatare, dzalarefka áte uŋɲule-aara. Emnde á Dadaamiya werre ɲanna wá, ba ervare keni dzegwánka wera we-aara ge magatera emtaŋkire. 34 Adaba fetarfire-aatare, ba derve á kára keni zaterka emnde ɲanna. Zlaɓe ádaliye, ndza tá kátá cebaterceba kelaade-aha-aatare an katsakar keni, ta ganaa ba itare ndzedá. Ndza ɓaaka payɗa-aatare, amá an fetarfire-aatare wá,

ndza ta emnde a ndzedá ba itare. Mbarmbe wáwa jipu, ma vaatara keni sey tá bakáterá ba itare emnde a wáwa á larde-aha umele. ³⁵ Á ba an fetarfire ŋanna zlaɓe ádaliye, ndza aŋkwa ŋwasha umele emtsaremtsa emnde-aha-aatare, amá naraterna zlaɓe ádaliye an shifa.

Amá emnde umele-aatare ndza naranna zlaɗa kwakya. Ma andze baránba ganakini tá dalika á ɗaba elva á Dadaamiya wá, ma tá naba yáteryá, amá eksaraareka una ɗekidɗeki, ta eksese ba emtsa am zlaɗa ŋanna, lauktu á de tsatertetsa Dadaamiya, á de vaterte shifa na jauje ge una am duniya an emtakire na. ³⁶ Emnde umele keni naránna laruwa ba estuwa, ta epsawateraahe, ta gyegaterse an ja, ta puwateremhe am kaderci, ta zlaɗateruhe am ɗaŋgay. ³⁷ Emnde umele ndza ta cebaa ba shifa-aatare an nakwa, emnde umele ndza ta ɗatsaterthe bubuwa, emnde umele ndza ta cebateraa an katsakar, emnde umele keni ndza ta zadateremhe am sleɗe ba estuwa, garevge talaga-aha, ta ŋguɗaa ba gwagwa, sharaterushe wahala, magarateránmaga palasa jipu. ³⁸ Ta naba nja áte ɓala-aha umele am kaamba, antara áte ire á wa-aha, ta hare am hwalakwa-aha antara am evege-aha. Emnde ŋanna wá, ɓaaka arge itare an jirire. Zlaya-aatareka ɗekidɗeki nja am duniya á laakire na.

³⁹ Emnde ŋanna baɗemme wá, hayaterháya Dadaamiya, aɗaba fetarfire-aatare áte ŋane. Amá wá, pakarvaaka an shifa am duniya na názena ni a baterna Dadaamiya geni á de vaterteva na. ⁴⁰ Aɗaba uwe? Áza Dadaamiya wá, ndza an tsatse duksa ŋanna zlauzle, geni á

geramika antara itare ɔekideki, mí de lyiyaná á ba átirpalle antara itare cuɔeɔɔfire na á de vamita ɔane. Una ɔanna duksa na shagera ge miya.

12

Dadaamiya Eddemiya baɔemme

¹ Daaci miya wá, emnde a fetarfe ɔanna ba seke tá jamitaave á ba an je. An fetarfire-aatare ɔanna, tá kwaramisá itare fetarfire áte Dadaamiya. Aɔaba una ɔanna, miya keni yaumiyanya haypa-aha na wayaaka mi pakyava ɔekideki na, valyawamiyaavalya gwatama na a piyamite de katafke áte barama á Dadaamiya na baɔemme, mí zlalawa á ba de katafke, kuɔaumika. ² Zlaɔe áɔaliye, zharaumizhara ba sera á Yaisu, aɔaba a magaminaa ba ɔane ɔgurna geni mí fetarfe, á de zlamiyansauwa ba ɔane zlaɔe áɔaliye ge fetarfire á miya ɔanna. Yaisu ɔane a naba eksaarhe geni ta ja shifa-aara áte dzaŋgala, wanka zherwe ɔekideki ge emtsa estuwa, aɔaba a fete ire-aara áte higa na á de vantá Dadaamiya na. Kina wá, ɔane aŋkwa am naɔafa á Dadaamiya am sleksire-aara.

³ Dzamaumidzámá ba shagera emtaŋkire na ni ta maganta emnde a haypa ge Yaisu na. Nja ba zlaɔa na ta magannaa emnde ɔanna, a naɔa baɔhuhe baɔemme. Slaɔlaɔlaɔle á ba áte náza-aara emtsaɔe, lauktu mí de shá ndzeɔa am zlaɔa-aha á miya keni. ⁴ Ge jirire wá, ekkure keni kwá aŋkwa wava jipu geni kwá janaaja haypa. Amá wá, zlaɔe jerka edda una ni emtsamtsá aɔaba una ɔanna am dagave á kure.

Daaci gazlauka dekiŋdeki. ⁵ Viyakurnaaviya elva na ndza a bakurnaa Dadaamiya ge vakurte ndzedfa an ŋane na emtu? Nawa a dƙurte an egdzara-aara. Adaba aŋkwa am wakita á Dadaamiya, á ba ŋane:

Egdza-aaruwa, má ya Yaakadada Dadaamiya, yá aŋkwa giyakgiya wá, sey ká fa hyema áte elva ŋanna. Ma yá valakarvale keni, á guleka higa á ŋa áte iya.

⁶ Adaba iya Yaakadada wá, yá giya edda una ni wayanwaya na, yá ja ba edda una ni gevge egdza-aaruwa na, a bina.

⁷ Aŋkwa egdzere ni á giyeka eddenjara dekiŋdeki emtu? Daaci áte zlada ŋanna wá, kwá naba diyeddiye geni á dzerakursaa ba Dadaamiya, kwa ba seke egdzara-aara. Má estuwa wá, bashawabasha bademme á zlada-aha na shakursha na, lauktu kwá de shansha nampire-aara.

⁸ Á giyatera ba estuwa Dadaamiya egdzara-aara. Daaci máki á giyakurka kure wá, kwa egdzara-aareka dekiŋdeki, kwá ba seke masagwa-aha am emnde-aara.

⁹ Zlabe ádaliye, dada-aha a miya am duniya keni ndza ta giyamigiya, ndza mí fa zherwe áte itare. Daaci faumifa zherwe áte Eddemiya na am samaya na keni. Má má aŋkwa fa zherwe áte ŋane wá, mí de shá shifa na á zleka na.

¹⁰ Dada-aha a miya na ta yamiya am duniya na wá, ndza ta giyamiya á ba am sarte na mi egdzara mesheshe, ba seke una ta beranaa itare ge shagerire. Amá Eddemiya na am samaya na wá, ŋane á giyamigiya geni á famiyem ndzedfa am vuwa, lauktu mí gevge emnde cudedfde

ba seke ŋane. ¹¹ Má Dadaamiya aŋkwa giya ura wá, vacite ŋanna wá, zlaɗa áte edda-aara, baaka higa-aara ɗekidɗeki. Amá má zlauzle zlaɗa ŋanna wá, edda una má diyeddiye nampire á zlaɗa ŋanna wá, á shá hairire antara zlalava shagera áte uŋŋule á Dadaamiya.

Faufa hyema áte ire á kure

¹² Diyakurdiya tsawe ganakini Dadaamiya á yanka giya egdzara-aara wá, daaci a guleka higa á kure, naba daumbare á de katafke áte uŋŋule-aara. ¹³ Tá aŋkwa emnde umele am dagave á kure, ta ba seke emnde a dere, cekwa ndzedɗa-aatare áte uŋŋule á Dadaamiya. Daaci ɗabaudaba uŋŋule na shagera na, geni a dzalarevka áte uŋŋule ŋanna, amá a sharansha ndzedɗa átekwa.

¹⁴ Tatayautataya nja lapiya antara emnde bademme. Tatayautataya an ervaunɗe á kure palle, geni kwá gevge emnde cudedɗe áza Dadaamiya. Adɗaba má baaka una ŋanna wá, ma ware edda-aara keni á taa daaka á deza Dadaamiya. ¹⁵ Faufa hyema áte ire á kure, geni ma ware á kure keni a yanaaka ŋurna á Dadaamiya. Adaliye, faufa hyema geni a jerka ura am dagave á kure ni mándzawe zlalava-aara. Ura estuwa á melateruka ge emnde áte barama á Dadaamiya, baira á badzaterbáɗza ba seke namgena am dagave á hiya am fe. ¹⁶ Zlaɓe ádaliye, faufa hyema áte ire á kure, geni a jerka ura ŋgudí am dagave á kure, á feka zherwe áte názena a wayanantaa Dadaamiya, ba seke

Isuwa werre. Nane wá, a naba velu makajiyire-aara ira warita á makajiyire bademme adaba zu duksa ser palle. ¹⁷ Ba ekkure keni diyakurdiya geni, am sarte na zlauzle veluvele wá, a deza eddenjara ágira a de kátá barka, amá a naba kwaleve ge eddenjara gar barka nanna. Baaka názu magaaka nane, antara yawe á kyuwa-aara campaukkwe átekwa, aley shanka pute geni á tsatsanaatsatse názena a badzanvaa nane.

¹⁸ Diyaweddiye geni tate á tse á kure ge kure á katafke á Dadaamiya wá, gevka seke náza á *Iserayiila-aha werre áte vuwa á wa Sina. Itare wá, ma tá naba dzegwandzegwa fetefa ba erva-aatare keni áte wa nanna. Ndza naranna nara á kára yaikke áte ire á wa nanna, ndza naránna tabedammire antara gwehya, ira válale yaikke. ¹⁹ Zlabe ádaliye, ndza cenarácena hula á duksa ba seke gaashi áte wa nanna, cenarácena kwára umele, kwára nanna wá, ba kwára á Dadaamiya. Am sarte na cenarácena kwára nanna wá, gazlargazla jipu, baira ta yeka ganakini a semka kwára nanna mazla-aara á sem hyema-aatare. ²⁰ Adaba edda-aara a se balaterse elva na zlazlada áte itare. A ba nane, ma ware keni a feka erva-aara áte wa nanna. Una ma ba dabba keni sey tá jana á ba an nakwa, a zlauzle shifa-aara ba estuwa. ²¹ Duksa-aha nanna ta naaná itare na wá, gazlateraagazla jipu. Ba Muusa an ire-aara keni a ba nane: Gazlangazla, yá gyagye ba seke maagara ge lyawa, a bina.

²² Amá ekkure wá, estuweka. Ekkure kwa sete wa na tá dahaná an wa *Siyaua, am

tate na átekwa berni á Dadaamiya Saksage. Berni ŋanna wá, ba Urusaliima na am samaya na. Kwa sem tate na ta átekwa malika-aha bademme baaka kezlakula-aatare na. ²³ Adaliye, ekkure, aŋkwa slede á kure am dagave á nalga á emnde na tá am geɗa yaikke átevege Dadaamiya na. Emnde ŋanna ta ba seke makaji-aha átevege eddetare, zhera-aha-aatare bademme aŋkwa an puwa áza Dadaamiya am samaya. Ekkure wá, kwa seza Dadaamiya na á de kyaná ŋane shairiya á emnde bademme na. Ekkure ɗabakurteɗaba emnde na tá aŋkwa áza Dadaamiya, a gatervaa ŋane cudeɗde am duksa bademme na. ²⁴ Ekkure, dakuraada á deza Yaisu. Ba ŋane una slemela emnde antara Dadaamiya, geni Dadaamiya á maga namána aŋwaslire antara itare. Ekkure, dakuraada á deza Yaisu na, ŋane a gakurve cudeɗde an uzhe-aara na. Uzhe-aara ŋanna wá, aŋkwa á kwaramise duksa shagera gergere antara una mi tsahese áte uzhe á Habila.

²⁵ Daaci faufa hyema ba shagera áte ire á kure, eblyawanveka elva á edda una aŋkwa á bakurá elva na. Werre wá, bademme á emnde na ndza ta kwaleve elva á edda una ni á fater magiya an elva á Dadaamiya am duniya wá, enjlarseka ɗekideki. Ge miya emnde na má aŋkwa cena elva á Yaisu na a sawa am samaya na keni, watse ba estuwa. Amaana, má kwalamiyevkwale, watse baaka pute á miya umele geni mí enjlesenjle an ŋane. ²⁶ Ndza werre ŋanna wá, Dadaamiya a ndaase ba elva an kwara yaikke, daaci a naba gejaavte ge haha

á ba an ndzedá. Kina keni elva-aara aŋkwa á bamiyánba geni watse á de emmága zlaɓe ádaliye ba estuwa. Amá antara ba samaya keni á de gejaava á ba an ndzedá, a bina. ²⁷ A ba ɲane, buwaaka ɗekideki wá, baɗemme á názena a nderanaa ɲane, á de gejaava zlaɓe ádaliye á ba an ndzedá, lauktu tá de zlauzle ba estuwa. Daaci tá de juwa ba duksa-aha na ɓaaka halavuwa-aatare ge itare ɗekideki na.

²⁸ Máki estuwa wá, miya wá, slafauminaaslafe ba we á miya ge Dadaamiya an ervaunɗe á miya palle. Adaba ɲane a famiyaa yaikkire na ɓaaka halavuwa-aara ɗekideki na ge miya. Galau-migálá Dadaamiya, njauminja á katafke-aara an fesarfire am elva-aara, njauminja an lyawa-aara am ervaunɗe áte una á kataná ɲane. ²⁹ Adaba Dadaamiya na mí yeka ázeɲara na wá, ɲane slera-aara ba seke slera á kára. Amaana, ɲane á shekwaaka kedanaakeda názena hayánka ɲane.

13

Á kátá uwe Dadaamiya áza emnde?

¹ Ekkure emnde a fetarfe wá, yawánka mága wayavire am dagave á kure, njawinja ba seke egdzar mama. ² A viyakurarka elva á lyiya wayve-aha na tá se tsekwa am mba á kure. Fawaterufe hyema ba shagera, adaba ndza aŋkwa emnde umele ta lyevaa wayve-aha-aatare, faraterufe hyema ba shagera, mbate wá, wayve-aha ɲanna malika-aha. ³ Emnde na tá am danɗay na keni dzamauterdzámá, zlaɗa-aatare ɲanna a gevge ba seke áte kure.

Adaliye emnde na tá am zladá-aha umele na keni, dzamauterdzámá ba seke kwa kerde antara itare am zladá ɲanna.

⁴ Emnde bademme a faransarfe ge Dadaamiya am elva á nika. Am dagave á tara zhele an mukse-aara, ma ware-aatare keni a badzanveka cudedfire á nika-aatare. Adaba Dadaamiya á de yanka záterá an shairiya, bademme á emnde a mága dakarire antara emnde a mága gwardzire.

⁵ Yawanánka ervaunde á kure ba ge waya shungu, naba higauhiga arge una aɲkwa am erva á kure, adaba a ba Dadaamiya: Yá aɲkwa antara ekka, ma vaatara keni, yá yaɲka dey.

⁶ Adaba una ɲanna, bawamiyánba ganakini Yaakadada, Dadaamiya-aaruwa aɲkwa am iga-aaruwa, baaka lyawa-aaruwa, á magiya uwe urimagwe? Baaka shaige-aaruwa dekideki.

⁷ Yehauteyeha male-aha á kure na ndza ta balakursaa itare elva á Dadaamiya na. Yehauteyeha zlalava-aatare, antara fetarfire-aatare áte Dadaamiya dem halavuwa á shifa-aatare am duniya. Daaci ekkure keni fautarfe áte Dadaamiya ba seke itare.

⁸ Yaisu *Almasihu wá, werre keni ndza ba ɲane, vatená keni ba ɲane ɲanna, ɲane á njá á ba áte una ɲanna dem ba ge dekideki.

⁹ Faufa hyema áte ire á kure, adaba tá aɲkwa emnde na tá aɲkwa jansaare ba itare an ire-aatare tsaha-aha umele gergere, ndza cenaránka emnde dekideki. Eɲkalaawa, geni a keɲarakuraaka áte baráma. Adaba a ba itare: sey má ura dabetedaba nade-aha áte elva a náza za bademme, lauktu á zlava ervaunde-aara. Cenauka una ɲanna dekideki. Sey an

ṅgurna á Dadaamiya palle. Baɗemme á emnde na ndza ta ɗabete jeba á naɗe-aha ṅanna, palle á názu ta shanaa itare ge nampire baaka.

¹⁰ Baɗemme á *liman-aha á Yahudiya-aha na kwasau zlaɓe tá faná ba sadake ge Dadaamiya am mashidi-aatare na wá, diyamidiya ganakini una mi shanaa miya áza Dadaamiya na, amaana emtsa á Yaisu na wá, náza-aatare ka, aɗaba itare zlaɓe diyarka nampire-aara. ¹¹ Male á liman-aha, má á daná sadake ge Dadaamiya aɗaba haypa á larde wá, tá ica dabba, á daná uzhe-aara á dem tate na cuɗeɗe jipu na. Hyuwa á dabba ṅanna maa, tá de deraná áte iga a ekse-aatare.

¹² Náza á Yaisu keni ndza a mágava ba estuwa. Ta de jaa shifa-aara á ba áte iga a ekse ṅanna, a shu zlaɗa áhuwa, geni á baraterá haypa-aha-aatare ge emnde baɗemme an uzhe á ire-aara.

¹³ Daaci máki estuwa wá, baaka nampire á jeba á nadina ṅanna mazla-aara. Saumisse, mi zlááwa á deza Yaisu, mí de ɓashán ba kerɗe epsawa á emnde. ¹⁴ Aɗaba baaka ekse na mí njá am huɗe-aara dem ba ge ɗekiɗeki am duniya na. Amá mí fete ire á miya áte ekse umele aṅkwa, mí de njá amkwa dem ba ge ɗekiɗeki.

¹⁵ Daaci galaumigala Dadaamiya, yawamiyanka. Má mí gálá Dadaamiya ṅanna wá, una ṅanna ba seke sadake á miya na mí vante ge ṅane aɗaba slera á Yaisu. Galaumigala zhera á Dadaamiya ge maraterá zhera-aara ge emnde baɗemme. ¹⁶ Viyawanaaka magatera maggwire ge emnde. Magaumága zezarzure an duksa na am erva á kure, aɗaba jeba á sadake ṅanna á vante higa kwakya ge Dadaamiya.

¹⁷ Cenausena názena tá bakurná male-aha á kure, fawatersarfe ba shagera, adaba tá ufaná ba itare shifa á kure, Dadaamiya keni á de ndavateru ba ge itare slera na ta maganaa itare ge fakuru hyema. Daaci má ekkure keni kwá anƙwa fathersarfe wá, tá maga slera ɲanna á ba an higa. Má baaka una wá, tá higeka am slera ɲanna. Má gulaagula higa-aatare wá, slera-aatare á magakuránka payda ge kure.

¹⁸ Yawánka ɲala Dadaamiya arge ɲere. ɲere wá, diyaɲerdiya ba parakke geni dzayye er-vaunɗe á ɲere, wayaɲerwaya ɲá maga duksa bademme á ba an unɲule-aara ma vaatara keni.

¹⁹ Duksa na yá kataná iya ázekure kwakya-aara wá, ɲalaunálá Dadaamiya geni a meliyumele, lauktu yá shansha baráma á eptsa á dezekure á ba áte watsewatsire.

Názena yá yekaná iya áza Dadaamiya

²⁰ Dadaamiya slevante hairire ge emnde, a tsantaa ba ɲane suni á miya yaikke am faya, amaana Yaakadada Yaisu. ɲane suni á miya á bá iya na wá, adaba ɲane a emtsehe adaba miya. Miya wá, mi ba seke kyawe-aha-aara. An uzhe-aara, Dadaamiya a ɲgudamiyaa namána na á zleka dekideki na. ²¹ Daaci a melakurumele Dadaamiya, geni kwá shansha mága názena á kataná ɲane bademme. A ganvega Dadaamiya namaari-aara am miya áte erva an Yaisu *Almasiihu, geni mí gevge áte una á kataná ɲane. Galaumigala Yaisu Almasiihu dem ba ge dekideki. *Aamin.

Ga use am halavuwa á elva-aha

²² Egdzar mama-aha-aaruwa, kwaya ɲane egdza elva na ya puwkurtaa ya, geni yá vakurta ndzedá an ɲane. Elva ɲanna kwakyeka, daaci yá aŋkwa ɲalakurɲala, taslawá á kure, fa-ufa ervaunde, cenauvaacena elva ɲanna ba shagera. ²³ Ambane zlaɓe cenakuránka deme ganakini egdza emmemiya Timaute keni ta bantsa ɓelaranaabela, sesse am dangay. Má samsa á sezeruwa wá, watse á puwisá ɲane ádeze kure.

²⁴ Gawaterga use-aaruwa ge male-aha á kure, antara emnde a fetarfe umele baɗemme. Emnde a fetarfe na tá am larde á Italiya keni tá aŋkwa gakur use-aatare. ²⁵ A magakuránmaga Dadaamiya ɲgurna ge kure baɗemmire á kure.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d